

No Servus, Diener und Habe die Ehre!

Etze kimmt dos

Nej su wos

vu Sömde, n 10. Feber 2024



Herbert Stumpe

Vierte Stunde: Deutsch

An Oubde, wenn ich su ban Biere sitze, gieht mr su ollrhand dorchn Koup. Naichtns ho ich, wall ich kejne Lust ufs Lasn hotte, wiedr amoul ei die Glotze gekuckt. No, Marandjuseff, dos wor kejne gude Entscheidung. Kejne Programme, die wos mr gefolln hon. Und drnounde ho ich mich ou noch iebr de Werbung gefuxt. Dos mit dan „bis zu hundert Perzent“ ho ich jo schunt amoul geschriebn, und dou hon sich noch a poore dro gehängt. De Walt word ömmr bleder. Obr dos wissn mr jo.

Wos mr drbeine obr ou noch ufgefoln ös, kimmt itze: unse Sprouche gieht immr mieh n Baach nundr. Dou ho ich schunt vur Juhrn gesoht, doss Politiker Bledsinn kajkn, ne bei politischn Sachn (dos dorf ich jo ne schreibn), obr vu dr Sprouche har. Dou sohn se doche: „wir lassen uns nicht auseinander dividieren“. Wiesu dos denn? Kon mr denn ou wos zusamm dividiern? Dos hiert sich su o wie „Negativwachstum“ und „Sondervermögen“. Obr ejtun wos, s muss abn, ou wens blede ös, gescheut klingn.

No, obr ne ock ei dr Politik össes an Orgn, ou mier tschotschern enn hibschn Bledsinn zusamm. An Bieroe hon mr a Kastl, dos speichert, wenn de ne dou bist, wos de Leute sohn. Und dos heißt: „Anrufbeantworter“. Schmorrn. Wiesu denn dos? Anrufbeantworter? Die Kastl nahm doch ocke uf, dou gibt kejs ane gescheute Antwort. Obr a jeds soht: Anrufbeantworter. Sein mir denn blede? Denkt ock amoul driebler nouch. Und wall ich schunt drbeine bie: Ban sugenanntn Enkeltrick totn se vu „folschn Polizistn“ redn. Dos vrstieh ich ou ne. Gibt's su wos? Folsche Polizistn? Ich denke, die sein drfundn. Wos iech mr vierstelln kennte, sein Leute, die sich fälschlicherweise ols Polizistn ausgahn. Desterwajgn sein dos obr noch kejne folschn Polizistn. Wall: A folschr Fuchzicher is a Fuchzicher - obr abn kej richtscher. Und enner, dar soht, ha wär a Poliziste, is abn dos ne. Ne ejfoch, obr iech sah dos su. Ihr ne ou?

No, und drnounde hättsch noch wos, um wiedr zoricke zur Glotze zu kumm: Dou redt ennr ei su aner Saubermachwerbung drvoune, doss ha dou an „anspruchsvollen Schmutz“ wegmochn misste. Dou koms mr huh! Is denn itze schunt dr Drajk ospruchsvoll? Kon dar bestömm, mit wos ha weggeputzt warn will? „Nej, dan Basn dou mog ich ne, dar hout ock su horte Stachln untnröm. Und iebrrhaupt mecht ich ock mit enn Samttichl gewischt warn, wos ei Biozitrounsoft egetunkt wurdn is.“ Jo, wu sein mr denn?

Ich musste glei wiedr o dos Bichl „Dummdeutsch“ denkn, wos Eckhard Henscheid 1985 rausgegahn hout. War vu euch Zeit hout, dos misstr lasn. Halfn tuts obr nischt, drweile sich de deutsche Sprouche ejgol verändert, wie ou frieher (sunst tetn mr heute noche indogermanisch kajkn, ou mir Noppenn!) ober mir Aln sein abn ne ömmr eivrstandn mit sittn Änderngn. Und ob wos ane gude odr schlaichte Änderung is, dos is ja ou ane personenliche Ogelegnheit. Wos dan enn gefällt, tut enn andrn fuxn. Und desterwajgn missn mr mit sittn Zeuge abn labn. Obr mr dirfn dou ou schreibn, wens uns zu org word.

Mejntr ne ou, doss de Walt ömmr bleder word, wie ich schunt gesoht ho? Und dou sein mr doch olle enner Meinung, odr amende ne?
